

**Perdana Menteri Tiba Di Brunei
Bernama
12 September , 2011
Oleh Kamarul Ariffin Md Yassin**

BANDAR SERI BEGAWAN, 12 Sept (Bernama) -- Perdana Menteri Datuk Seri Najib Tun Razak tiba di Lapangan Terbang Antarabangsa Brunei di sini untuk mengadakan lawatan kerja ke Brunei bersempena Rundingan Tahunan Ke-15 bersama Sultan Brunei Sultan Hassanal Bolkiah.

Ketibaan Perdana Menteri di lapangan terbang itu pada 3.30 petang disambut oleh anakanda Sultan Brunei, Pengiran Muda Abd Azim.

Turut hadir di lapangan terbang itu ialah Menteri Luar Datuk Seri Anifah Aman, Menteri Pertanian dan Industri Asas Tani Datuk Seri Noh Omar dan Timbalan Menteri Perdagangan Antarabangsa dan Industri Datuk Mukhriz Tun Dr Mahathir.

Program pertama Perdana Menteri di Brunei adalah menghadiri majlis sambutan Hari Raya Aidilfitri bersama warga Malaysia di Empire Hotel & Country Club di sini.

Perdana Menteri kemudian bertolak ke Istana Nurul Iman bagi menghadiri Konsultasi Tahunan ke-15 dengan Sultan Brunei dan kedua-dua pemimpin dijangka membincangkan pelbagai isu serantau dan global.

Kedua-dua pemimpin juga akan menyaksikan pemeteraian perjanjian antara Malaysia dan Brunei berhubung projek pembinaan Jambatan Sungai Pandaruan yang akan menghubungkan Limbang di Sarawak dan Temburong di Brunei.

Selain itu, mereka akan menyaksikan pemeteraian tiga Memorandum Persefahaman (MoU) yang berkaitan dengan kerjasama ekonomi dan pelaburan antara Brunei Darussalam dan Sarawak serta Brunei dan Sabah dan MoU kerjasama antara PETRONAS dan PetroleumBRUNEI.

Perdana Menteri dan rombongan kemudiannya akan menghadiri majlis santap malam yang dihoskan oleh Sultan Brunei.

Siri Rundingan Tahunan Antara Ketua-Ketua Kerajaan Malaysia dan Brunei diadakan secara

bergilir antara kedua-dua negara.

Malaysia menjadi tuan rumah bagi Rundingan Tahunan Ke-14 di Putrajaya pada 21 Sept 2010.

Perdana Menteri dijangka pulang ke Malaysia esok.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsgeneral.php?id=612905>